



Tanvi Sharma-i Taipei Open
koka otsü tasen ka yangluogo

Iran nung amakba US Tir
Trump-i thia atar



Mangkolemba sub-division nung lenmang aser yim aika takoksa ajurua lir



Tsurmen & Aonokpuyimsen



Yajang to rajabari



Waromung



Worumong, Yimjenkimong & Molungkimong

Mokokchung, 2nd Aug (TYO): Tawa tanü balaka July 19 sülen nungi Mangkolemba Sub-division kübok Japukong aser Jangpetkong tzükong ana nung alima yimya lendong agi lenmang den kiojen jenti raksaja takoksa tulu ajuruba osang angazüker.

Japukong o Jangpetkong nung lenmangtemji shisadangra küm talangka meyanglur aser junga anepalu masüba agi talisa meiwa tzünglu tulu arudang tzükong ana lenmang nung ya raksarabong tali buluba ajurua

arur.

Taküm lenmang raksaba rongnung kanga mejungi kongshibaji talisa Molungkimong, Yimjenkimong aser Waromung yim lushi nung lir. Tangji iba tesem nung lenmang lapoktsü asoshi mapa kanga meranga inyakdar, ta angazüker.

Iba lenmang ya temesü asüba agi mapa inyak mesatemer. Tesasatsükaji concerned department (PWD) ket nung item mapa inyaktsü kol (machinery) mali, iyongji,

tangar dang hire sür dang amshir ta angazüker. Yangji tebilemdangtsü ka lir.

"Tim mera kar yakta magira tesem aika nung lenmang ponger aotsü chance kanga lir, anungji, sarkari mapang shitak nung teinyaktsütem inyakatoktsüla", ta yangji alir nisung tejangja ka den iba osangbeneri jembidang metetdaksü.

Tzünglu tanen maka aruba agi talisa lenden lima Longnak nung tzülu aser anggo tzübo aika raksatsüogo aser yimtsüing aika nung anentsüh lendong ataloka

kiojen jenti raksaba osang angashir.

Japukong lima Longjemdang nungi tenzüka tesem aika nung anentsüh agi lenmang anenbanger. Item rongnung kanga mejungi kongshibaji Lirmen o Yajang (A) na tsüngda lir. Iba den ano Yajang (C) o Tuli na tsüngda aliba apu ponger aoba ajanga yim pungu den 13 IR pur kanga timtemba osang angazüker.

Yajang (C) nungi Rajabari (Assam) koba alternative lenmang ka lir, ibajia apu tila

den tashi maitba ajanga ariana gari tila dang senzüteter, ta ashir.

July 19 nü tzünglu tanen maka tsükba ajanga Noklangsangba Govt. High School Lirmen ki tagitsü majung raksatsüogo. Joko tasen yanglutsüba dang, anungji, khen atema tesem kadi belener school tenzüka aotsü sentong aliba angazüker.

Tsürmen o Aonokpuyimsen na tsüngda nunga tesem-tesem nung anentsüh kanga bulua alur, saka tangbo anentsühji oktokogo saka ano kodang kechi ataloktsüar ashitsü makokba tensa ka nung lir, ta angazüker.

Amguri lenmang raksaba ajanga joko gari tulutembo teimbaka National Highway 702 (Mariani road) nung jajar. Saka iba lenmang ya New Camp nungi Longtho tashi kanga majung. Iba den Aosenden lenjem anasa anentsüh agi lenmang bener aotsü menua lir aser iba lenmang paitoka jajaba lenmang ka lir, saka iba nungjia tesem aisü nung anentsüh alur, ta osang ajanga angazüker.

Mokokchung district noklang shilem nung Mangkolemba sub-division yagi 40% cover asür aser Mangkolemba ya reprangdangra lenmang aisü nungi ngujem tulu aketba sub-division ka lir. Temulung agütsüra ibai rongsenkettsüing renloka aotsü nükla tulu angur saka aiben state sarkari iba sub-division renloktsü atema temulung agütsüba mangur.

Delhi Ao Senso Telongjem (DAST)-i Tsüngremmung amung

New Delhi, August 2, 2026 (TYO): Delhi Ao Senso Telongjem (DAST)-i August 1, 2026 nü Tsüngremmung benjung ayongzüka mungogo.

Iba benjung ya Barat Ghar, Jhareda Village, Delhi Cantonment nung amung aser Delhi-NCR region nung alir nisung 500 den tali adenshia shilem agiogo.

Sentong nung Joint Secretary, Ministry of External Affairs, GoI Vishwesh Negi, IFS tongti tesemdangr liasü aser Joint Resident Commissioner, Nagaland House, New Delhi Sharon Longchari, NCS-i tetushi süa jaoker ama shilem agi.

DAST-i Nagaland adena orr Ao Naga sobaliba aser inyaksangshi wazüka ayutsü aser ajungkettsü asoshi

meranga inyakba atema tenüngsang agütsür. Lanu putu sobaliba teratem den senaktepa alitsüla aser loktiliba asoshi mapa tajung inyaktsü o jembirtemi ayongzüük.

Iba benjungmung nung Traditional Cultural Song Competition ka liasü aser Aor telok balalai tetsü-tebou kentem aten.

Iba cultural session nung Guru Sangyusang Pongener-i tetushi süa jaoker ka ama shilem agia liasü.

Pai shilem agirtem dang sempet tajung aser bendanga agütsüba atema tenüngsang agütsü.

"Asenoki tarutsü pututem asoshi traditional folk music aser indigenous cultural heritage wazüka ayutsüla" ta Guru Sangyusang-i ashi.

Nagaland nem additional tax devolution Rs 524 crore agütsü

Guwahati, August 2, 2026 (Agencies): Centre-i Nagaland nem tax devolution indang additional instalment Rs 524 crore agütsüogo.

Linük kübok state balala nem Rs 1,09,019 crore lemzüksüba nungi Nagaland nem additional instalment agütsüogo.

August 10 nungi regular monthly tax devolution tenzüksü lir saka Union Ministry of Finance-i additional instalment agütsüogo. Iba ya state tem nem infrastructure development aser tanga priority projects asoshi senotsü amshitsü teyari agütsür.

Northeastern state tem rongnung Assam nem Rs. 3,413 crore, Arunachal Pradesh nem Rs. 1,920 crore, Manipur nem Rs. 762 crore, Meghalaya nem Rs. 849 crore, Mizoram nem Rs. 618 crore,

Tripura nem Rs. 943 crore, Sikkim nem Rs. 365 crore, aser Nagaland nem Rs. 524 crore agütsüogo.

National level nung Uttar Pradesh-i sen teimtiba nguogo aser ibaji Rs. 19,208 crore lir. Parnok sülen Bihar-i Rs. 10,845 crore, Madhya Pradesh-i Rs. 8,010 crore, West Bengal-i Rs. 7,866 crore aser Maharashtra-i Rs. 7,022 crore nguogo.

Centre sorkari yaküm October nunga tax devolution nung Rs 1,01,603 crore talila agüja liasü. Iba ya regular monthly instalment den talila agütsüsemba lir aser developmental o welfare programmes yaritsü atema lir.

Amit Shah-i SDRF jelia agütsütsü mulunger

Union Home Minister aser Minister of Cooperation Amit Shah-i State Disaster Response Fund (SDRF) nungi

Central share Rs 2,117.85 crore jelia agütsütsü mulunga agizükogo.

2026 tzüngluruwa mapang tzümetsüing agi kongshia aliba state tem yaritsü atema pai senotsü jelia agütsütsü mulunga agizükogo.

Prime Minister Narendra Modi lenisüba kübok sorkari State tem nem relief, rescue & rehabilitation measures atema nüngdakba teyari agütsür aser tensa reprangshimdar.

Arunachal Pradesh aser Assam-i Inter-Ministerial Central Teams (IMCTs) yokogo. Assam-i IMCT ana aruogo aser tzümetsüing tensa reprangdangogo. Nagaland sorkari mepishiba ama IMCT telok ka tentetogo.

Tzümetsüing agi kongshiba state tenet rongnung Himachal Pradesh, Odisha aser Nagaland-i financial year 2026-27 atema SDRF first instalment nguogo.

NIT Chümoukedima nung Nasha Mukht Yuva sentong nung Angh aden



National Institute of Technology (NIT) Nagaland, Chümoukedima nung August 2, 2026 nü Nasha Mukht Yuva for Vikshit Bharat Sankalp Abhiyan sentong nung Nagaland Angh Nand Kishore Yadav dena aliba noksa nung angur.

Dimapur, Luroi/August 02 (TYO): National Institute of Technology (NIT) Nagaland, Chümoukedima nung August 2, 2026 nü Nasha Mukht Yuva for Vikshit Bharat Sankalp Abhiyan sentong agiba nung Nagaland Angh Nand Kishore Yadav dena liasü.

Iba sentong ya Government of India-i temesepba mozü maliba linük ka yangertsü asoshi lanurtem, kaket reju aser nüburttem anidentsü nükjidong nung linük tesem ajunga nung temesepba mozü amshiba anema hopta 100 campaign nung shilem ka liasü.

Angh-i Nasha Mukht Yuva for Vikshit Bharat Sankalp Abhiyan nung shilem ka ama kaketshir temi awareness campaigns temaitsü poster exhibition lapoka aliba semdang. Kaketshir temi iba ama apiteta inyakba asoshi pai tenüngsang agütsü aser iba movement indang ambassadors ama kuma tarutsü nung temesepba mozü maliba lokti asoshi osang prokshitsü ajungmesoa liasü.

India Ato Kilonser Narendra Modi-i Nasha Mukht Yuva for Vikshit Bharat Sankalp Abhiyan kübok temesepba mozü anema

100-week nationwide campaign tenzükja jembiba live telecast asüba nung Angh den iba sentong nung shilem agirtem dena liasü, shibai linük nung aliba lanurtem dang temesepba mozü anema nokdakba movement anitsü aser Vikshit Bharat asoshi shilem agitsü ayongzü.

Sentong tembanga Dr. Manoj E. Prabhakar, Registrar, NIT Nagaland ajanga melepzung o jembia liasü.

Iba sentong nung NIT Nagaland nung tesayur, kaketshir aser ketdangsürttem shilem agia liasü.

Security tali yokba repringshitsü Naga Women's Union-i akhanger

Imphal, Luroi/August 02 (Agencies): Naga regions nung security tali yokba repringshia ajemdaktsütsü asoshi Naga Women's Union (NWU)-i asendenshir akhanger aser Manipur nung mitkar tali yoka aliba ajanga security tajungba kumdaktsür masü civilian tem dak ang kongshir ta ashi.

Union-i security agencies ajunga dang pei mapa shidak inyaktsü, 'operational restraint' shidak amshitsü, civilian tem takum kumzüka ayutsü aser indang indanga constitutional laws amshitsü nenshia ashi.

July 29 nü Noney district nung arishi küm 29 tain Village Guard Pough Lanbime Riamei

tepsetba sülen NWU-i asendenshir iba tayongzüka ya agütsü. Security forces aser telungpur telok ka lungjemer amakba atema NWU-i aitsü aser iba inyakyim nung ochi obendang meshia liasü.

Riamei tepsetba ken o ochishia aser indang-indanga bushisüngdang asütsüla aser memonui ochi obendang shidak agütsütsüla, ta parnoki sorkar aser ketdangsürttem dang ajungshia liasü.

Noney nungi kilometer 17 shi pilar Bitiang yimtsüng nung amakba khukhua aitsü aser azüdokshi ya ZUF-J aser Central Reserve Police Force (CRPF) CoBRA personnel

külemi inyak, ta NWU-i aitsü.

Parnoki Riamei nem akhum agütsü aser pa ya bendanga agütsür inyakba Village Guard ka lir aser par nüburttem kumzüka ayudang takum bendanga agütsü ta ashi.

Tesüiba mapang azüdokshi atalokba nung tebilemtsü akaba nenshia NWU-i ketdangsür tem dang Naga nung civilian trok pua bener oa tepseter nem ozüng agi melaba ama merenshitsü ajungshi aser iba azüdokshi mapa ya Leilon Vaiphei village nungi inyak ta tai tongloktü.

NWU-i Naga nüburttemeden, meimchir temeden aser security asoshi maneni nokdaktsü, ta ashi.



Anogo ishika tzunglu kanga sashia aruba sülen Old Tssori yimdak July 31, 2026 anepdang alinen tuluka alua liasü. Iba alinen yagi tekülem ki aser temeket compounds indang retaining walls atsüzüker ao aser office building telaor aser tekülem ki-a tetsübotsü jenjang ka nung lir, ta Associate Pastor, Baptist Church, Old Tssorii village, Robert Ngullie ajanga ashi.

ADC Longleng ajanga lenmang yangluba metetdaktsür

Dimapur, Luroi/August 02 (TYO): Additional Deputy Commissioner, Longleng ajanga sangdong ka nung Tangha-Kangching-Tamlu-Merangkong-Dimapur lenmang yanglushiogo aser iba lenmang Light Motor Vehicle (LMVs) atema lapoktsür ta metetdaktsüogo.

Ajisüaka tzungsang kanga majungba den long tsükba, alinen aluba aser lenmang anasa ali tashi maitba mechi

NH-702 (package-1) nung Changtongya-Dikhu section nung nikongdang 6:00 ako nungi anepdang 6:00 ako tashi gari mesenzütsü, ta ashi.

Tzungsang majungba mechi nüburttem kanga tongtipang nungdak mapang kisüng ang senzütsü, saksalema senzütsü aser tzunglu kanga sashia aruba mesüra tenük agi junga manguba mapang mesenzütsü ayongzüker, ta sangdong ajangasa ashi.

Labour Commissioner-i aibelenba trade unions dang metetdaktsür

Dimapur, Luroi/Aug. 02 (TYO): Office of the Labour Commissioner, Nagaland ajanga yimjak nung sangdong tanaben agütsüba nung, Trade Union Act, 1926 indang Section 8 kübok register süa aliba trade unions ti (8) ozüng nung aibelenba mesüra non-functional aliba ngutetogo aser Registrar of Trade Unions ajanga deregistration sütsütsü ta ashi.

Sangdong ajanga ashiba agi, item unions ya Dimapur Motor Workers Trade Union, Dimapur Auto Rickshaw Owners Union, Dimapur Land Transport Workers Union, East Dimapur Purana Bazar Labour Trade Union, Dimapur Taxi Drivers Union, Dimapur Cycle Rickshaw Pullers Union,

Dimapur Truck Drivers Union, aser Kohima District Land Transport Trade Union, Phesama alitsü.

Mezüng sangdong kübok anogo 30 agütsüba liwaogo. Aser aibelenba trade unions tem regularise asütsü asoshi maongka tatembangba agütsür, ta ashi.

Shia aliba unions tem akhi ama mapa inyaktsü tebilemba lira aser registration magiendaktsünüra, iba sangdong agütsür anogo 15 tsüngta Registrart of Trade Unions dangi tezüluba agütsütsüla, ta ashi.

Latetja aliba mapang telangzüba magütsüra, Trade Unions Act aser tapet ozüng kübok shia aliba yimya nung registration agentsütsü, ta sangdong ajanga ashi.

Mokokchung District Congress Committee-i ken o jangjashitsü

Dimapur, Luroi/August 2 (TYO): District Congress Committee-i sangdong ka ajanga tawa Congress party worker tem aikti party toktsüba indang osang prokshiba jengjashitsüogo. Ken o dak sendakba nung osang ya tejangja metettsü atema committee-i bushisüngdang ka tenzüka liasü.

Bushisüngdang ya tembangogo aser resignation shiti nung sign süa alirtem ya aika shitak masü aser iba ya shitakba mapa nungi anenba ta agizüktsü makok, ta kasa sangdong ajanga metetdaktsü.

Maneni bushisüngdang ajanga sign asür 61 rongnung 14 bo Indian National Congress nung züngsem ka ama züngoksema mali, anungji parnok party nungi resign asütsü nungdak madokba ngutetogo.

Ano sign asür parnok 28-i iba shiti nung sign asütsü atema parnok anisa liasü ta shiogo, aser iba sign ya parnok Congress party toktsütsü atema amshitsü asoshi ta memeteti liasü, ta shiogo.

Iba den züngsem 10 indang memberships bo magizüki liasü.

Item tongutetba balala ajanga züngsem kari resignation agütsüba koba nüburttem nem

metetdaktsüogo, iba yagi Mokokchung District nung aliba Congress party worker tem taginüba aser tejangraba mesayur. Party nungi nisung aika anenogo ta sayutsü merangba ya bushisüngdang ajanga tai ta sayuogo.

Party worker tem tamendakdak tai sayutsü merangba ya DCC, Mokokchung-i kanga süoki ia agir, ta sangdong ajangsa metetdaktsü.

Party-isa, ken o jangjashitsütsü atema tejakdangi aruba party worker ajak dang kanga pelaba lemsatepogo aser Indian National Congress züngsetem atema parnok bendanga agüja aliba sangdong ajangsa nenshia metetdaktsüogo.

Party tashi itshidaktsütsü atema aser Mokokchung district nung aliba nüburttem ochishia nendak nendaka tenzüktsü atema DCC, Mokokchung maneni bendanga agütsür lir. Onoki party worker, party pusemertem aser nüburttem dang tarutsü nungbo official party channel tem ajanga agütsüba osangtem dang agizüktsü mepeshia metetdaktsür, ta kasa sangdong ajanga metetdaktsü.



August 02, 2026 nü Kolkata nung West Bengal Chief Minister, Suvendu Adhikari-i Bangladesh tsür kaketzülur, Taslima Nasrin nem tetushi agütsüdü tangokba noksa nung angur. Kasa noksa nung West Bengal Minister, Swapan Dasgupta-a angur.

Viksit Bharat atema temesepba mozü nungi pilatsüla: PM Modi

New Delhi, Luroi/August 02 (Agencies): Amongnü Ato kilonser Narendra Modi-i Nasha Mukt Yuva for Viksit Bharat Sankalp Abhiyaan tenzüksüogo; linük tesem ajaklen temesepba mozü anema raratsü atema lanurtem ajungmesotsü nükjidong nung iba campaign tenzük.

Ato kilonser Modi-i lanurtem dang, India nung lanurtemi pei teinyaksü shilem angateta dang lir, ta metetdaksü.

Video conferencing ajanga iba campaign tenzüksüba sentong nung Modi-i, 2047 küm tashi nungbo Viksit Bharat nükjidong ataloktsü atema temang anema aliba aser temesepba mozü nungi pilaa aliba lanur nütsüng nüngdaker, ta ashi.

"Kanga tongtibang telemtetba ka atema asenok yangi sentepa lir. Iba mapatong ya nija ka, kibong, lokti aser talisa linük atema lir," ta pai ashi.

"Asen linüki Viksit Bharat

nükjidong ataloktsü atema tejakleni aoba mapang nung linük nung lanurtem ya shisatsü aser shimang ajak anema alitsüla, iba denji külemi temesepba mozü nungi pilaa alitsüla. Anungji temesepba mozü ajanga timtem agütsüba lanurtem nem angatetdaksütsüla," ta pai metetdaksü.

MY Bharat volunteers-i hopta 100 'Jan Bhagidari (people's participation) movement' tenzükba mapang ka nung iba campaign-a tenzük.

Hopta shia Amongnü anogotem nung linük tesem ajaklen temesepba mozü ajanga timtem balala agütsüba angatetdaksütsü aser temesepba mozü maliba lokti ka yangerba nung shilem agitsü atema ajak ajungshitsü.

Hopta shia saisapong sentongtem, walkathons, sobaliba sentongtem, awareness sentong, lenmang nung jilushi sayaba, o lemtepbba sentongtem

aser tetoktepbba balala agitsü.

Yaküm Kashi nung iba mapatong ya pilot project ka ama tenzuka liasü, aser tangbo linük tesem ajaklen yimsü dak sendakba organization-ia iba mapatong pusemer, ta pai ashi.

Modi-i, yimsü dak sendakba organisations 125-i Kashi Declaration agizükogo, iba ya temesepba mozü meshimeshia mamshitsü nükjidong nung küm pongu asalentong ka lir, aser iba bangzüng ya yaküm July ita nung Varanasi yimti nung Youth Spiritual Summit agiba mapang nung renemba lir, ta metetdaksü.

"Taruba küm 20-25 nung nenoki nenok taküm atema lenmang sayutsü. Viksit Bharat nükjidong ataloktsü atema nenoki India tejakleni anitsü aser süngjang tajung achirtemji nenok asütsü. Linüki nenok tashi aser sempet nüngdaker, anungji linük aser nenok taküm atema nenoki temesepba mozü nungi pilaa alitsüla," ta pai ayongzü.

Cockroach Janta Party lenirtem August 5 nü senden amentsü

New Delhi, August 02 (Agencies): August 5 nü Maharashtra kübok Chhatrapati Sambhajinagar nung Cockroach Janta Party (CJP) nung tongti lenirtem senden ka mena tongtibang onüktem atema asalentong yanglutsü.

Iba senden ya CJP tentetsang, Abhijeet Dipke'er kidang ayongzüka amentsü.

CJP nung tongti züngsemtem dang volunteers aser kaketsirtem

den shisa lemsatepbba sülen senden nung tebilemba onüktem benokang, ta jelia metetdakja lir.

August 5 nü senden tembangba sülen CJP-i osangbenertem senden ka ayongzüka parnoki telemtetba agiba osang metetdaksütsü.

Ano külen Dipke-ia par kidang district balala nungi kaketsirtem, lenirtem aser tesemdang balala ajurua shisa lemsatepogo, aser tanurtem den 'Friendship Day'

among.

NEET paper leak asüba anema CJP-i mapang talangka Jantar Mantar nung longkak aita aruba sülen tesüsa Union Education Minister Dharmendra Pradhan-i menden nungi anena liasü.

Minister-i menden nungi anenba den külemi sorkari tenangzüka kar metetdaksüba sülen kaketsirtemi longkak aita anena liasü.



August 02, 2026 nü Karnataka kübok Shivamoga nung anentsüh agi ki ka anenbangba sülen sepaitemi anentsüh agi anenbanga aliba nisung ka kümzüka mapang tangokba noksa nung angur. Iba lendong nung arrshi küm 3 tanur ka densema kibong ka nungi züngsem asem asü.

KI ASER KIMONG AYOKER -

Tuli 19th Mile nung ki aser Kimong ka tayoktsü lir. Jenjang Rs.20 Lakhs, (Slightly Negotiable) Contact : 70058 15910

Court balala nung exam ochi-mashi dak sendakbakeno 158 lir

New Delhi, August 02 (Agencies): Public exam balala nung ochimashi dak sendakba ken o 158 court balala nung anendaka lir.

CBI-i item ken o bushisüngdangba renemogo saka court aika nung tang tashi item ken o angadang metenzük; item ken otem karbo küm 20 tejaklen benokba ken otem lir.

Central Bureau of Investigation (CBI)-i high courts ajak dang item ken otemji fast-track courts nem agüjang ta ashitsü atema telemtetba agiogo. Tawa Parliament nung agizükba anti-paper leak ozüng tasenba kübok state balala nung item ama ken o angadangtsü atema fast track courts amenokdar.

Osang angazükba agi, CBI-i high court tem dang parnoki item ken o angadangtsü atema special prosecutors agütsütsü ta ashitsü aser tekeraba nung item ken o bentettsü atema nüngdakba teyari ajak agütsütsü ta ashitsü.

Linük yimtiba, Delhi kija nunga 2000 küm nungi tenzuka item ama ken o 25 anendaka lir. Item ken o ajak CBI-i bushisüngdangogo saka tang tashi ken otemji courts nung anendaka lir.

Delhi nung aliba ken otem rongnung AIIMS PG recruitment examination 2010-11, Delhi University Medical & Dental Entrance of 2011, CAT

(common admission test) 2004, SSC (staff selection commission) recruitment 2013 aser teachers' recruitment exam densema lir, ta osang ka ajanga metetdaksü.

Bihar nunga item ken o pongu anendaka lir aser iba nungjagi ken o asembo NEET 2024 paper leak ken otem lir; tanünga ken o anaji PMT (pre-medical test) 2003 aser PMT 2011 lir, ta parnokisa metetdaksü.

Himachal Pradesh nunga item ama ken o asem lir aser item ken o rongnung Constable recruitment 2022 densema lir.

Jammu & Kashmir nunga junior engineer & constable recruitment ken o densema ken o asem anendaka lir, Jharkhand nunga ken o pongu, Karnataka nunga pongu, Maharashtra nung asem, Rajasthan nung ti, Tamil Nadu nung 14, West Bengal nung 10 aser Uttar Pradesh nunga ken o ter anendaka lir.

Tawa Parliament nung paper leak aser exam nung ochimashi nokdangtsü nükjidong nung Public Examinations (Prevention of Unfair Means) Amendment Act, 2026 agizükogo. Iba ozüng kübok state aser Union Territory ajaki sessions court ka Special Fast-Track Court ama shima item ken o tekeraba nung angadanga bentettsü.

Iba dak alia state aser Union Territory ajak dang item ken o atema special public prosecutors kaka shimtsü tuyuogo.



August 02, 2026 nü Bengaluru nung Karnataka Chief Minister, DK Shivakumar(ajichi) aser taoba mapang chief minister Siddaramaiah na party ajak senden ka nung adendang tangokba noksa nung angur.

Kerala nung tzünglu dak sendakba lendong nung nisung 8 süogo

New Delhi, August 02 (Agencies): Amongnü Kerala Chief Minister, V D Satheesan-i, state nung tzünglu dak sendakba lendong balala nung nisung 8 süogo, nisung 13 yiru aser nisung 8 samaogo, ta metetdaksü.

Satheesan-isa, anentsüh aser tzümsüng lendong balala nung ki 27 meshimeshia raksaogo, ki 196 tera raksa aser nisung 5,792 kümzüka relief camp 209 nung jenokdakja lir, ta metetdaksü.

State sorkari item lendong nung asür kibongtem nem senotsü teyari agütsütsü aser kiojen raksaba ajanga takoksa angurtem nem-a teyari agütsütsü, ta pai metetdaksü.

CM-i, tzünglu aruba terabo süngjemogo, ajisüaka nüburtemi, talisa tekong nung alirtem kanga kümküma alitsüla, ta metetdaksü.

Satheesan-isa, pai Revenue Minister A P Anilkumar densema district balala nung lemsükja aliba minister tem aser ketdangsertem den maneni tongtepratepda, ta ashi.

Paisa party balala nung inyakertem danga kiojen tanaben yangershiba aser teraksatsüba bentetba nung shilem agitsü ayongzü.

Kerala State Disaster Management Authority (KSDMA)-i ashiba agi, Honibarnü state tesem kar nungbo tzünglu 320 mm tashi arua liasü, aser ibaji ajanga ali nemzüka aliba tesem aika nung tzu metsüngbanga liasü.

India Meteorological Department (IMD)-i August 3 aser August 6 anogotem nunga state tesem aika nung tzünglu sashia arutsü, ta metetdaksüogo.



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 03, 2026

Backward ya kin masü !

India telungjem kübok Nagaland state kümer Nagaland nung aliba Naga kintem telok ana küma lemdangbaji , kin kar ' backward' aser iba backward telok nung mezüngsemba kintemji parnoksa 'Forward mesüra Advanced' kintem akümer. Atangji, Nagaland nung Naga kintem rongnung yamaji Backward aser Advanced ta lemsabaji tazüng-temetetba aser rongsen jenjang ajung-majungba asadanger latet alitsü. Aji oda, iba amaji kasa nisung aser kinungertem rongnungsa asüyonga tamalen purtemi tesülen pur nema maongka yutsütsü aser tesülen purtemjia tamalen purtem menepa arutsü asoshi parnok nema akok tashi tazüngba tsütsüa aser government mapa bushiba tsütsüa shilem balaka shiteta yutsüba sentong ya junger. Atangji, iba ama alima nung libalirua aotsüba maparen nung tamalen purtemi tesüpurtem asoshia bilemja maongka balaka shiteta yutsüba ya Union government nunga 'Backward' ta metetshiaka Scheduled Caste aser Scheduled Tribe ta jajetja lir aser item nemji tazüngba nunga aser government mapa agütsüba nunga shilem balaka shiteta yutsür. Iba jagi dang, asenok Naga nungertema ST tenüng nung tazüngba nung , talisa, medical aser engineering nung menden tajung ngua züngteter aser government mapatem nunga, talisa, Civil Services nung maongka angur. Kasaji, Nagaland nunga 'Backward' ta ajaba telok nung züngoka alirtembo parnok asoshi balaka shiteta yutsüba nung dang masü saka ano ajak atema ayuba shilem nunga maongka agiteta tazüngba nunga aser government mapa nunga shilem tajung angur. Atangji, Nagaland nunga Backward ta mesüi ojang tapet ka bushia aja nungbo koda jungla ta bilemer, kechiyong backward ta asü dangji teti backward-leni dang aoer amai bilemstsüsa angar. Kasaji, advanced ta asü dangjibo iba telok nung adenertemjibo joko ita petinua tonger alitsü amai bilemdaktsür. Ajisüaka, Nagaland nung Backward aser Advanced telok na pronglaji yamaji masü, iba jagi backward telok nung züngoka aliba kintem rongnunga menden ka atema mesüra mapa ka atema ajak külemi merangdang tajungtiba agitsü asoshi tatidang magitetter saka kin shia pei pei tarensen aser mapang lir. Aji oda, Advanced telok nung züngoka alirtema bilemba ama masü saka aiben tazüngba nunga aser mapa bushiba nunga Advanced purtem dangbo backward purtemang kanga agia Advanced tasüba jenjang nung angur. Ibaji kodang bilemdangdir, Backward aser Advanced ta asüba ya kin masü saka nisung dak aketer. Aji oda, kin masü saka nisungba dakji temetetba aser shisatsü peria lira, kinbo backward tenüng nung züngoka alitsü akok saka nisungjibo backward masütsü. Kasaji, nisung ka dak temetetba aser shisatsü peria melira, paji kinbo advanced asütsüa akok saka nisungbajibo backward asütsü. Kasaji, tazüng tashi aser temetetba nung dang masü saka rongsenren nunga advanced ta asüba kintem rongnungi kibong kar nungbo tanü chiyongtsüa maka aser talidaka maka ta alitsüa akok saka backward ta asüba kintem nungibo kibong karbo chiyongtsüa chir mechima aser kiojena lir melima alitsüa akok. Iba jagi Backward aser Advanced ta asüba jenjang ya kin apia bendangtsübo shitak masü kümogo. Atangji, backward aser Advanced ta asüba ya tazüngba aser government mapa bushiba nung dang masü saka pei lima aser nübortem asoshi tajung inyaksü tangatetba aser mangdang lira, aji Advance pur asütsü saka shirnoki pei achitsü aser pei agitsü dang bilema tangar mezüngoker aser mezüngmeshir, parnokji backward asütsü.

OLEMSABANG

BAPTIST TELOKI BAPTISTPUR JENTOKBA OTSÜ

~ P.Renthy Jamir

(Yashi adok nungi...)

Baptist tesayuba (Distinctive) nung koma ali memetet. Saka Baptist puri Baptist yamaji reshikangshia mungdang nungi küm tenet jentok kodang Baptist puri Baptistpur tamangertem reshikangshiba jentokba limapurtemi angu parnok mulung kanga raksa-a aria bilem. Aser parnoki ya tsürabur sobaliba nung maliba tamatemjentsü mapa yamala inyakerbo semchisemnur azükaru masü atakatem kaor ta shia tenla kiji tasen asütsü nübu agi yaria süngküm tongnü sürra azü agüja tenla kiji asü. Tenlaki süteta liaka mungdang nungi jentok nungji tangar Arogo pura marutsü parnoka kecha Arogoia maotsü ta Ozüng tesashi liasü.

Küm tenet tashi mungdang nungi jentoka alidangji arogopur aser limapur külemi yaritepa sentsüh aser nübu jenti entoka arogoji agizükdaktsütsü lenmang bushi. Joko Mokokchung SDO aika melenteper asünung 1928 SDO C.R Pawsey den jembitep. Aser June ita 1928 nung Dobashi Lendinokdang arua governmenti shibanga aliba arogoji lapoktsür ta metetdaktsü. Governmenti lapoktsür külen tesü Ao mungdang nungi Rev. Supongwati aser Temreptsüba arua jentoka alibaji agizüker ta metetdaktsü. Lai nungbo tokur toku shibanga lir ka malibaji arem min lungren ajak sema bushi ta lir. Saka Ao mungdangi tangar tiazü oshi angar British governmenti shibangtsüba kecha tsüngtong arua mereprangdangi arogoji jentok. Shitakba agibo mungdangi yaria government denji jembitsü tim liasü. Arogo nung baptia aliba züngsem 153 jia joko tazüngla aser küm tenet kata merenloktsü ta Baptistpuri baptistpur reshikangshiba tatalokba otsü jembir.

Ao mungdang nungi jentokaka teyanglur Tsüngremi mesentok nung Changtongya aliba Arogopurtem rongnung tamanger tajung aika adok tongtibangsa tejangrar aiür asangur kentener tajung yim balala Arogotemi sayutsüngi onür jenti liasü. Saka jentoka ali nungji menentsü oset ka ama arogo aikati magizük aser sempaseta bilem. Saka arogo kari agizük. Jentoka aliba mapang 1923 nung yim ka nung oa arogo tenzüksü, ano yim ka nung oa arogotsür mission tenzüksü, yamaji Ao mungdang nung sendaka meliaka sayutsüngiba mapa balala inyak. Ano Impur nungi missionary Dr. James Riley Bailey aser Miss. E.M Stevenson parnoki aiben jentoka aliba arogopurtem arua ajungshi. Ano Dobashi Lanükümzü, waromung pai aiben Arogo semdanga tamang nung tasüita alitsü ajungshi. Jentoka alinungji kari kanga sempa kari aria bilem.

Alemli shisatsü agi anünga yim ka nung teti tenu tsüngda yamaji sempatepa mapa tamajung inyaktepaka tanübo tai temenen ajak Tsüngrem dang nangzüka tatok meshiteper jangratema putepa alir. Arogo tenzükbä Jubilee-a kasa yim ana külemi alidang tenzükbä Anogo agir. Anungji Changtongya yimsena yim akümba anogo masü Jubille-bo küm 14 agi jilia amunger yangji mangatetep kecha mali. Kechiyong Baptistpur mungdang temzüng nung mezüng baptibaji Arogo tenzükbä ta amshitsü telatet agüja lir.

Asen tsürabur limapur mapang tashibangtsü tesempatsü tulutiba menen ki-i ir Asangki nung alirtem nema chitembo bener oa agüja mesü. Baptist Arogopurbo peri per mei ama, angoi ango achi ama, ozüi ozü achi ama kenbo "PARNOK ANIR ARUNG MENEN NUNGI ANIR ARUNG" ta atener. Saka baptist teloki baptistpur jentokba tatalokba otsü ka khen asentenshia zülur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arise Asia 2026 nung lanur aikati mission mapa inyaktsü lemtet



July 31, 2026 aonung Manila nung Arise Asia 2026 Congress tatembangbuba sentong nung linük 54 nungi adenshiba lanurtem tangokba noksa nung angur.

August 02, 2026: July 31, 2026 aonung Manila nung Arise Asia 2026 Congress tembangogo aser lanur 300-i taküm piyong mission mapa inyaktsü telemtetba agiogo, aser iba ya Arise Asia Congress puti otsü nung lanur teimtibai mission inyaktsü melungtetba asütsü.

July 30 aonung Manila nung aliba Christ's Commission Fellowship (CCF) Central nung lanur 300 jungnüai tenangzükba agi aser July 31 nü iba sentong tembang.

Italy nung küm 16 tashi missionary inyaka arur Brazil tsür, Sarah Breuel-i Ibri nunger oshi 'hineni (????????)' ("Ni yangi lir") nung ajemdaker mission mapa inyaktsü ayongzüka liasü.

Breuel-i, "Taonung ya linük kar aser taküm kar atema tongtibang aonung ka asütsü. Tsüngremi 'Ni shiba yoktsü?' ta asündanger," ta ashi.

Ibri tapu 11 nung ajemdaker Breuel-i, kodakeri metet, ta ashi. Laisa Tsüngremi ajaba langzütsü atema Samuel-i aonung saakba aser Lipok 22 nung Tsüngremi tenyaba angatsü atema Abraham-i langzüba metetdakja "Mapang shidak nung hai, ta langzüba ajanga puti otsü nung temelenshi alitsü," ta ashi.

Sarah Breuel-i, "Temelungjang ka, 'hineni' temelungjangi 'hai' ta ashir aser tashi angar. Küm aika sülen Samuel-i Dawid mezüja shimtet aser Tsüngremer nübурtem atema Tsüngremi otsü tasen ka tenzükja liasü," ta ashi.

Breuel-i Latin America nung aliba school ka nung business degree renemba sülen global multinational company ka nung interview agütsü.

Lai interview agirtem dang la nükjidongji 'missions' lir, ta ashi. Lai mapaji mangu. Tesülen la kinüngbu tena Italy yimtiba,

Rome-i aoba sülen tenati tesüiba küm 16 tsüngda Arogo aika tenzüksüogo.

Iba sülen Arise Asia executive director, Rev. Dr. David Ro-i Ibri 12:2 nung ajemdaker timtem aser tepela dak sendakba onük jembia liasü.

Iba sentong nung pai tayongzükba asem agüja liasü. Tayongzükba mezüngbuba kübok iba sentong nung adener ajak dang Kibubai tenyaba wadang inyaktsü- ita shia sarasademba movement ka nung shilem agitsü aser pei aliba yimti nung yaritepa Arise movements nung shilem agitsü ayongzük.

Tanabuba tayongzükba kübok küm ka mission internship nung shilem agitsü ayongzük. Iba dak sendakba nung Ro -i tenyar Paul-i missions wadang inyakba mapang nung mapang shia Timoti-i pa den yaritepba atishia liasü.

Tasembuba tayongzükbaji cross-cultural mission atema tayongzükba liasü.

Ro-i, "Mapang talangka cross-cultural missionary inyaktsü atema ajakbo mejateter. Tenyar Paul ya Yihuda nunger ka Yihuda nunger masüba nisungtem dangi yokba liasü. Peter, Yakob aser Yohan nungeri pei nübурtem rongnung tenzüka liasü. Asenok rongnung Peter, Yakob aser Yohan nunger ama aika nüngdaker. Ajisüaka nenok rongnung karibo Khrista osangtajung mangashidangba tesemtemi aotsü atema taküm bendanga agütsütsüla; aser iba ya maongka tajung ka lir," ta ayongzüka liasü.

Paisa mission mapa inyaktsü atema melungtetertemi nokdakba sülen sabangleni arung ta ayongzüka liasü. Iba sülen lanurtem aika tejakleni aruba sülen pastor tem aser missionary temi longbanger parnok atema sarasademja liasü.

Ro-isa tepuokdak aliba par medemer tenüng pongu metetdakja parnok atema sarasademjang ta ayongzük.

"Tenla agütsüba nung tepela alitsü atema ni sarasademer. Kenü anogo nungbo nisung telok kati, Khrista osangtajung bener aruba atema nü dang pelar ta ashitsü," ta Ro-i metetdaksü.

July 31 nü tatembangbuba sentongji missionary, Paul Elliott leniba nung agi aser paisa

tatembang anküp o jembia liasü. Elliott-i US nung pastoral ministry toktsüba sülen tesüiba küm aika Southeast Asia nung tenzüka arur.

Pai, "Tan hopta ya milak jangrulokba mapang ka liasü. Joko nenoki tanela nem anidakja tashi angaa inyaktsüla," ta metetdaksü.

Elliott-i, "Na junga renema aliba agi Tsüngremi na jatetba masü. Pai nai yanglu. Nai temeja kin ka nungi, oshi balaka aser linük balaka nungi lir, aser ibaji Tsüngremi jelia nü nem lemozüksüba lir. Anungji kecha tatemtsü kuli magütsüi Tsüngrem tenzüksüla," ta metetdaksü.

Paisa lanurtem dang, Khrista mesüka alitsü, Tsüngrem tajaba jangjatsü, timtem asadangtsü, nübурtem den sendakteptsü aser taküm piyong angazüksü ayongzük.

Elliott-i, "Tang nungi tenzüka küm ter tsüngda timtem ajangshitsüsa aliba tesemtem nung na alitsü, nü tamang atangji tendangtsü aser nüktzü-a alutsü, anungji Tsüngremer tajaba tejangja angateta Tanela Temeshi nem anidakjang, local Arogo aser kibong züngsemtem den angatetepa tenangzükba agiang," ta ayongzük.

Arise Asia ya David Ro-i tentetba lir. China nunger pastor aser Arogo nung lenir kati dollar sen 5,000 tenla agüja pai Arise Asia ya tenteta liasü.

Georgia nung saisaponger kaketshir 120-i Khrista nem bendanga agütsü



August 02, 2026: Georgia nung aliba Arogo kati tawa sentong ka nung saisaponger kaketshir 120-i Khrista nem bendanga agütsüba osang metetdaksü.

First Baptist Church of Hazlehurst (FBC)-i Strength of a Champion Ministries den senteper "Night of Champions" sentong ayongzüka liasü, aser iba sentong nungji kaketshir 120-i Khrista sülen anidaktsü telemtetba agi.

First Baptist Church of Hazlehurst nung executive pastor, Philip Worthington-i Strength of a Champion Ministry den senteper chiyungtsü, saisapongtsü asayatsü aser Khrista osangtajung lemsateptsü atema sentong ka ayongzüka counties trok nungi saisapong tesayurtem (coaches) aser kaketshirtem jaoka liasü.

Night of Champions sentong nungji adentsü atema Middle school aser high school nung azünger saisaponger teams jaok.

Worthington-i ashiba agi, iba sentong nung adentsü atema Arogoi kakeshir 500 aser coaches 70 atema chiyungtsü renemja liasü.

Strength of a Champion Ministries nungi Craig Whitt-i, "Night of Champions" sentong ya evangelistic outreach ka liasü; saisaponger kaketshirtem ayongdenba nung Arogo den parnoki yaritepa iba sentong ayongzük, ta metetdaksü.

Iba sentong nung coach temia taküm kuli lematepa liasü. Taoba mapang NFL nung asayar, Jake Fromm-i coach tem dang, "Nenoki lanurtem

taküm nung temelenshi tulu bener arutsütettsü. Nenoki tanela aika anir aruttettsü. Tsüngremi item tanela aginer. Tsüngremi nenok amshitsü," ta metetdakja liasü.

Jeff Davis High School nung coach Greg Nail-i, "Tanü putu nung tainlonglongpurtemi ajangshiba tayongzükba balala atema lanurtemi Tsüngrem tama südaktsütsüla," ta ashi.

First Baptist Hazlehurst nung Pastor Brad Waters-i, "Iba sentong ya Arogo indang mission ka lir; Yisu Khrista sentsüwangshidaktsütsü, nütsüngsütsü aser Kibubai tenyaba wadang inyaktsü atema lir. Iba ya Khrista osangtajung lemsateptsü atema aser lanurtem tanela kümzüksü atema lir," ta metetdaksü.

ANOGO ABEN TSÜNGREM DEN

SHISABULU NEM TEKOKDAKTSÜ

Anungji asüng asoshi shisa tebulu, kechiaser asüngi pei asoshi shisatsü. Anogo shia pei asoshi yari toushi teperi lir. ~ Mathi 6: 34

Taküm nung ratamataba, shisa ramaba aser mulung zürepba, item ajak ya asenok dak shisabuluba aitba ajanga lir. Kodang asen tamang nung tanokshiba lidir aiben asen dak iba shisabuluba nem ya kokdaksür. Atangji asenok ajagi asen sasa mita alitsübaji asen tamang akanga alitsüla. Saka asenok aikadi asen dak tatidang, tendangba agi amakdang asenok iba temenen shisabuluba nem ya kokdaksür. Ano kodang asenok iba shisabulu agi asenok süngdaktsüdir asen sasa timtemji tali-tali dang iba shisabulu tashi nem ya asen taküm nungji amokbangdaktsütsü aser iba timtem yagi pei kechi teinyaktsütem lir, meinyakteter aser asen alizütemji kodanga matongtsü.

Atangji iba shisabulu ya kodang tali asen sasa bendenlokdir temang, tamang aser tenla ajak nung koda masüba jenjang ka nung yutsür. Anungji, kechiba asen sasa iba shisabulu aser ratamataba nem ya kokdaktsütsü? Kechiba ya tsübutsü? Yisui ashir, shisabulubaja amajok lir, iba ya asenoki koktettsü. Atangji asen Tsüngremi ajak metet aser Pa temeimji onsara tajung lir. Asenoki inyaktsübaji Pa dak amangtettsüla, Pai ashiba shitak inyakra asen khuret ajakji Pa temeimi süngdaktsütsü aser asenok nem telemtetba lenmangji sayutsü.

Adianutem! Yisui ashir shisa tebulu, raratamataba nungi pila-ang aser Yisu dangi arung ta ayongzüker! Kechiaser Pa Temeimi aneptsür..

SARASADEM:

Kibuba Yisu, kechiba onok shisabulu nem kokdaktsütsü, iba ya temenen tera ka lir atangji onoki na bushir, ne dak jenoker. Amen

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züla

(n) ninang aser longpen chanu tashikang junga metentet (pupa, grub)

* Ninang tesepe nung züla alidang aji meraksatsütsüla.

Zülak

(n) zü talak (top of young bamboo shoot)

* Zü adoka alidang zülak meyrutsütsüla.

OLONG PAITEP # 7586

	1				2	3			
4			5						6
						7			
	8								
	9			10			11		
						12			13
14									
						15			

TIPILEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jemiba
12. Saklok
14. Samaba mebushitet
15. Mejanga onü
16. Tzü shiruru ka

LANGTSÜNGLEN

1. ____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. ____ kibur
13. Tebur tembar tsüngda jatepba

OLONG PAITEP # 7585 TELANGZÜBA**TIPILEN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER

Andhra Pradesh kübok Alluri Sitarama Raju International Airport, Bhogapuram nung July 31, 2026 nü Dhimsa dance performance ka Guinness World Records nung züluokogo.

Paderu, Seethampeta, Parvathipuram aser Rampachodavaram nungi Integrated Tribal Development Agency (ITDA) regions nung Class VIII, IX aser X lisopur tetsür kaketshir 13,000-i iba tsüngsang ai. Parnok ajaki sobaliba pink sarees den green borders aser green blouses agir shilem agi aser London nungi Guinness World Records team ka arua kulisür Tribal Welfare Minister Gummadi Sandhya Rani ket nung world record certificate agütsü.

Assam-Meghalaya arrtsülen Kulsi dam anema lungkak aiter

Guwahati, August 2, 2026

(Agencies): August 1, 2026 nü Assam-Meghalaya arrtsülen aliba yimtsüng Ukiam nung nisung aika adenshir Kulsi River dam anema lungkak aitogo. Parnoki iba mapatong athitsü atema takhangba agütsüogo.

Iba sentong ya Assam-Meghalaya Joint Protection Committee ajanga ayongzük aser state anaprong nungi nisungtem Kulsi River zükümlen adenshir lungkak aita liasü.

Kulsi River ya Ukiam nung ayong asem lokteper akümer aser Assam o Meghalaya sorkartemi idaki tzünokdang ka yanglutsü sentong lir. Iba asoshi

Brahmaputra Board nem Detailed Project Report (DPR) renemtsü mapa lezmüksüogo.

Iba mapatong anema küm aika noktaka arur aser Meghalaya nung Khasi nunger aser Assam nung Rabha, Garo o Bodo nungertemi tzünokdang ajanga parnok kiojen, alu aser ecological balance raksatsü tsübur.

"Assam Chief Minister Himanta Biswa Sarma-i tesüiba nung lisopurtemi mapatong magizükra Kulsi River nung tzünokdang kecha meyanglutsü nangükogo. Ajisüaka, July 30 nü Assam Power Generation Corporation Limited ket nung DPR agütsüogo aser iba ajanga

onok tsübuteper" ta Joint Protection Committee youth president Biswajit Rabha-i ashi.

Sorkartemi public tebilemstülem magizüker aser tzünokdang ajanga tsünglanglen alir nisung meyrjang aika lendongi aitsü ta Rabha-isa ashi.

Iba sentong nung Rabha aser Garo kaketshir teloktem dena telok aikati shilem agia liasü.

Upper Assam nung tawa tzümetsüng ajuruba ajanga water-related disasters indang tatishitsü tajung sayur anungji sorkartemi iba mapatong ya public safety tenüng nung agentsüla ta Kamrup district nung Rabha Students' Union-i metetdaksü.

Manipur police-i Nagaland arrtsü anasa auyaba gari ka angu

Imphal, August 2, 2026

(Agencies): Manipur Police-i auyaba gari ka aser mobile phones aika ngutetogo aser külen sepaitemi tesem balala nung telungpurtem puogo.

Khuzama Police Station nungi osang sangoktsüba sülen Manipur Police-i July 31 nü Nagaland arrtsü anasa Senapati Police Drop Gate nung auyaba Maruti Jimny (AR-01T-5409) ka ngutet. Iba gari driver aser gari Khuzama Police ket nung agütsüogo.

Tanga tatalokba ka nung

Senapati district police-ia auyaba mobile phones pungu tashi ngutet aser Senapati Police Station nung kiburtem ket nung agütsüogo.

Tawa tasen sayaba tracking facility ka ajanga mobile phone tem bushitet aser tesüiba ita asem tsüngda auyaba mobile phones 10 nungi 15 shi nguteta kiburtem nem agütsüogo ta Manipur Police-i ashi.

Manipur Police-isa People's Revolutionary Party of Kangleipak (PREPAK) züngsem Ningthoujam Nanao Meitei

(Lanthongngakpa) apu.

Külen, security forces-i Tenguopal district nung PREPAK züngsem ana apu. Tena ya Takhelbam Yaiphaba (25) aser Khumukcham Tondonba (22) na ta jangjaogo.

Police-isa Imphal West district nung Kangleipak Communist Party People's War Group (KCP PWG) züngsem Khunthoklemba Oinam apu. July 28 nü Yumnam Leikai, Singamei nung ki ka nung hand grenade ka yutsüba nung pai shilem agiba atema apu.

Sorkari Sivasagar, Charaideo nung electricity bills magir

Guwahati, August 2, 2026

(Agencies): Sivasagar aser Charaideo district tem nung July ita 300 units tashi electricity agir alirtem dang nungi power bills magitsü aser state sorkari Chief Minister's Relief Fund ajanga iba sen aotsü ta Chief Minister Himanta Biswa Sarma-i ashi.

Tawa tzümetsüng ajanga kongshia aliba kibongtemi senotsü khuret pungpatsü atema iba mapa inyaker ta CM Sarma-i Facebook Live session ka nung ashi.

Sorkari 300 units tashi amshir aliba smart meter consumers indang accounts recharge sütsütsü. Külen, July ita post-paid consumers ajanga atsükba kasa consumption limit ji Chief Minister's Relief Fund nungi

menoktsü. Ajisüaka 300 units tema amshiadoker aliba consumers-ibo electricity bills menoktsüsa akümtsü ta Sarma-isa metetdaksü.

August 3 nungi tzümetsüng agi kongshia aliba kibongtem indang bank accounts nung Rs 15,000 enoktsütsü. Sivasagar nung beneficiaries 55,000, Charaideo nung 20,000, Jorhat nung 7,000 aser Golaghat nung 3,000 shi kati iba senotsü teyari angutsü ta paisa ashi.

Sivasagar, Charaideo, Jorhat aser Golaghat nung kaketshirtem school-i tanaben aotsü atema Class I nungi VIII tashi kaketshirtem nem school uniforms set 2 aser notebooks angati agütsütsü. State sorkari

school uniforms alitsü atema Chief Minister's Relief Fund nungi Rs 7.62 crore lezmüksüogo ta CM Sarma-isa metetdaksü.

Sivasagar aser Charaideo nung alirtem asoshi tan financial year nung land revenue (mati khajana) magitsü ta paisa shisem.

Pei talidak toktsür aoertem aser kidangi meyipa moutetba kibongtem nem August 10 nungi Rs 10,000 agütsütsü ta Sarma-isa ashi.

Sorkarisa August 5 aser 6 tsüngda raksar aliba rejutem yanglushitsü atema grants agütsütsü. Sorkari Namghar shia nem Rs 1.5 lakh aser Anganwadi centre shia nem Rs 2 lakh nungi Rs 2.5 lakh tashi teyari agütsütsü.

Moscow nung tetsür kati bomb bener arua restaurant ka nung pokdaktsü

Moscow, Luroi/August 2 (Agencies): Moscow nung Honibarnü nikongtsütsü tetsür kati kidang yangluba bomb ka bener arua restaurant ka nung pokdaktsüba sülen nisung asem tepset aser nisung 21 yiruogo, ta ketdangsürtemi metetdaktsü.

Bomb ya local mapang 20.00 nung Kudrinskaya Square nung Italian restaurant ka anasa pokdakja liasü.

Russia indang Anti-Terrorism Committee-i ashiba agi, mejangjaba tetsür ka restaurant telungi aitsü merang saka security guard kati nokdanga liasü, ta state RIA news agency-i metetdaktsü.

Osang ajanga ashiba agi, Balzi Rossi Italian restaurant nung bomb pokdaktsüba sülen tetsürla, security guard sang aser customer ka asü.

Yirur alirtem ya karbo kanga

mejungu yirur lir, ta police-i ashi.

Russia indang state RIA news agency-i iba tesem nung police ketdangsürtem adenshir aliba video ka sayuogo. Iba restaurant ya shibanger lir.

Ketdangsürtemi lendong nung asürtem mesüra yirur alirtem aser iba bomb ya shibai podaktsü iba indang osang tejangja magütsü.

Ukraine den rara tenzüker küm pezü dak tema aoba mapang Russia indang FSB security service-i taküm küm tetenzüklen, temaba jenjang nung aliba military ketdangsürtem kümzüka toktsütsü atema jenjang talila agitsü ta shir liasü.

Ketdangsürtem aika tepsettsü merangba sülen iba telemtetba ya agi. Ketdangsürtem tepsettsü merangba ya Moscow-i Kyiv dak tai tonglokja arudar.

Kommersant osang kaket sangdong ka ajanga ashiba agi, bomb ya restaurant indang summer terrace nung mena aliba tesemdangertem tepsettsü tebilemba nung bener aruba liasü.

Bomb ya tangar kari remote ajanga pokdaktsü asütsü ta bilemer, aser tetsürla yagia lai bena aliba oset ya bomb asütsü ta memeteti liasü asütsü südi, ta kasa sangdong ajanga metetdaktsü.

Restaurant indang website ajanga ashiba agi, iba tesem ya jurila sentong ka atema Honibarnü shibanger liasü.

US midterms elections anasai arur asünung, international sapang nung pai telemtetba agiba ajanga par linük nung par administration asoshi timtem tulu asütsü ta Trump-i meteta lir.

Iran nung amakba US Tir Trump-i thia atar

Washington, Luroi, August 02 (Agecnies): US Tir Donald Trump-i Iran dak amakba thia atar, saka tekeraba nung tezüngzüktep ka yanglutsüla, ta ashir.

Truth Social post ka nung, Iran aser Middle East nung tanga linük temi pa dang amakba anena atatsü asüngdang, kechiaser tezüngzüktep ka indang "perimeters" mulunga agizüker lir ta ashi, ta US tiri ashi.

US aser Israel nati ano asendenshir Iran dak amaktsü sentong tasen yanglur südi ta osangtem angazükba sülen Trump-i tang tesüsa iba osang ya sangdong.

Trump-i iba ama samatsütsü tekum dangtsü agütsüba ya tang mezüng masü, aser iba sülen paisa yimjung nem maongka agütsür ta shia liasü. US aser Israel nati February 28 nü maka tenzükba rara tembangtsü asoshi tezüngzüktep yangluba mesüra jembishinü tasen tenzüksü asüngdangba indang Iran-i tejangja shia mali.

Deobarnü Iran indang acting Defence Minister Majid Ibn al-Reza-i ashiba agi, 'psychological warfare' nung shilem ka ama dang süaka par tsükchirtemi amokmerenba ajak shidak aser tejangja ama agir.

"Onoki meimlai malitsü mesüra marakzüi-a malitsü," ta pai ashi.

US aser Israel nati Iran nung energy infrastructure targets nung tesashitiba bomb pokloktsüba campaigns tenzüksü sentong lir ta US media nung osang balala angazükba sülen osü ya melenshir.

Iba sentong ya Hokulbarnü Trump indang cabinet senden amendang yanglu, ta osang kar ajanga ashir.

US sorkari Middle East



US Tir Donald Trump

tesem ajunga nung aliba America nungertem danga saksalema alitsü aser region nung tensa tamajungba kumra ainshitsü renema alitsü metetdaktsü.

Honibarnü post ka nung, "US ya Islamic Republic of Iran anema World War II sülen mongudangba 'Military Terror'aser Tashi amshitsü renema lir," ta Trump-i shia liasü.

Amaktsü aliba athiba ya tarutsü nung alima ajanzüktsü atema lir aser kasaji Iran takok aser yimchiyimjunga alitsü atema lir, ta pai ashi.

April 7 nunga US tiri Iran-i yimjung ken o jembiba nung shilem agitsü memulungra, taoning 'civilisation' ajunga asütsü, ta amokmerena liasü.

Pai civilian infrastructure aser power plants tem samatsütsü amokmeren, koba nisung aikati 'war crime' asütsü ta shia liasü.

Yamaji amokmerenba ajanga Vice President JD Vance-i anir Pakistan nung tejak jipeta ajurutepa jembishinü aka.

Hokulbarnü senden amendang osangbener kasa takdang nung lia Trump-i, "Asenoki parnok (Iran) dak kanga sashia amaktsü. Aser parnoki 'Onoki joko makoker' ta ashitsü," ta ashiba angashi.

Anogo ka lir Saudi Crown Prince Mohammed Bin Salman-i region nung tensa

tajemba kumdaktsütsü nükjidong nung Trump den phone ajanga jembi, ta Saudi Arabia official SPA press agency ajanga ashi.

"Pai tensa ajema kumdaktsütsü atema olemtep nung tongtipang shilem agitsü aser yimjung asoshi akokba tashi inyaksü nüngdaker ta ashi."

Gulf nung US tembar linüktem asoshi tebilemtsü alibaji, America linük ya Iranian missiles meta agi metongtetaka Bahrain, Jordan aser United Arab Emirates amala linük yabo atonger aser yangji mesü tzü (tzüyim tzü) agi tajemtsü tzü kumdaktsüba plans ama tongtipang infrastructure nung tenük yokba ya lir.

Rara anentsü nükjidong nung April ita ceasefire ka yangluba June ita raksaba sülen Washington aser Tehran na maktepba nung asendenshia aser kati ka dak tayang kepzüktepa arur.

US-i Iran nunger rongnendak tesemtem mokdang aser Iran nung tesem balala nung bomb pokloktsü, aser Iran-ia Middle East tesem balala nung US sepai aliba tesemtem nung missiles aser drones khaloktsür aser Strait of Hormuz nung rong tem dak tenük yoker.

America nunger shilem 60 shi-i Iran den raraba ya maginer, ta Pew research centre ajanga ashir, aser iba yongji Trump sentüsü ajema akumer.

Tensa tamajungba akumba ajanga totzü jenjang tali akumtsü aser US nung nüburtem tali tim atemtsü, kechiaser Iran nung rara metenzükdang alima nung amshiba totzü aser natural gas shilem 20 shi Strait of Hormuz ya ajanga bena liasü, koba rara tenzükba sülen Iran-i shibanga lir.

Indonesia nung rong ka nung mi adok; nisung 5 asü



Jakarta, Luroi/August 2 (Agencies): Indonesia kübok Madura asetkong nung Deobarnü passenger abenba rong ka nung mi adokba sülen nisung pongu asü aser nisung 41 samar bushidar, ta linük indang rescue agency-i sangdong ka ajanga metetdaktsü.

Iba rong nung passenger aser crew 271 mena liasü. Deobarnü osang agütsüba mapang tashi nung Passenger aser crew 271 rongnungi parnok 225 bo kümzükogo, ta kasa sangdong ajangsa metetdaktsü.

Samar alirtem kümzüktsü atema tekümzükba maparen maneni benoka inyakdar.

Rong ya Indonesia kübok East Java nung yimti tulutiba rongnung tanabuba Surabaya nungi South Sulawesi nung Makassar-i oya aliba mapang rong anisangi rong nung mi adokba osang agüja liasü, ta National Search and Rescue Agency-i metetdaktsü.

Surabaya Search and Rescue Office tekolakba Nanang Sigit-i ashiba agi, iba rong anasa aliba rongtema tekümzükba maparen nung shilem agidar.

"TB Hasnur 26 aser British Mentor nati KMP Mutiara Sentosa 2 nungi tzüyim nung pongoktsür aliba passenger tem kümzükba maparen nung shilem agidar. Iba rong meketa rong

pezü anener inyaktepdar," ta Nanang-i ashiba Jakarta Global sangdong ka ajanga metetdaktsü.

Paisa, search-and-rescue nung amshiba rong SAR 249 Permadi iba tesemi odar saka ghonda trokshi agitsü ta ashi.

Social media nung prokshiba video tem nung iba rong temaba takdang nungi mokozü adokba aser mi tanga tesemia prokshia aoba sayuogo. Passenger tem life jacket semer rong tezükülen adenshir aiba nguogo.

"Osang ajanga ashiba agi, passenger tem iba rong anasa aliba rongtemi belentsü atema atatepdar," ta Ministry of Transportation nung ketdangsür Muhammad Masyhud-i ashi.

"Passenger aser crew kümzüka toktsütsüji onok atema tinyaktsü tongtibangtiba lir. Rong nung mena alirtem takaratiba nung kümzüktsü atema onoki ken o dak sendaka alirtem den maneni tongtepratepa arudar," ta paisa shisem.

Indonesia nung iba amala lendong ya aiben ataloker aser taoba itang nisung 70 mena aliba rong ka Selayar anasa angemoka aiba sülen nisung pezü asü aser search operation tembangba mapang tashi nunga nisung 14 monguteti liasü.

PUBLIC NOTICE

This is to notify all the Consumers & Stakeholders of the State of Nagaland that **Soleos Energy Ltd.** has filed a petition for **Generation Tariff Determination of 15 MW Solar Plant at Tuli, MOKOKCHUNG district**, before the Hon'ble Nagaland Electricity Regulatory Commission (NERC) on **28th July 2026**.

The summary of DPR and Tariff Proposal are as below:

Executive Summary:

- Particular : Details
- Generator : Soleos Energy Ltd. as IPP
- Capacity : 15 MW AC
- Stages of Development : Land Development, EPC activities, etc.
- Capacity Utilization Factor : 15.13%
- Gross Power Generation : 19.5 million units (MU)/year
- Loan Term : 70%
- Debt Equity Ratio : 70:30%
- Nearest Sub Station : Tuli Sub-station (66/33 kV) at 2.5 Km distance
- Plant Type : Solar Plant

Estimate Proposed on Cost & Finance

Sr. No.	Particulars	Amount (in lakhs)
1	Land Cost (65 acres) per year lease	₹ 16.25
2	Civil & general works	₹ 182.52
3	PV Modules	₹ 2700.00
4	Mounting Structures	₹ 449.2
5	Evacuation cost up to interconnection point (Cables & Transformers)	₹ 220.00
6	Preliminary & Preoperative expenses	₹ 401.50
7	Total Capital Cost	₹ 6000.00
8	Proposed Tariff per kWh	₹ 4.00

(Revised)

3. Interested parties may peruse the said DPR and Tariff petition from the Office of Soleos Energy Ltd., by mail: support@soleosenergy.com on payment or can download from the NERC's official website i.e. www.nerc.org.in

4. Objection/suggestion, if any on the DPR and Tariff proposal submitted by the developer through the State Government, together with supporting materials may be filed before the Secretary, Nagaland Regulatory Electricity Commission, near E-in-C Office, Department of Power, Nagaland, Kohima in person or through registered post so as to reach the Commission on or before 2nd November 2026.

5. The Public Hearing on the above matter shall be as per the date, time and venue decided by the Hon'ble Commission in due course of time.

Mr. Dhaval Jiyani
Soleos Energy Ltd

Tanvi Sharma-i Taipei Open koka otsü tasen ka yangluogo



Tanvi Sharma

Luroi/August 2, 2026

(Agencies): India tsürtem rongnung badminton asaya nung kanga kara renloka aoba asayar Tanvi Sharma-i Deobarnü alizüing tasen ka tongteta lai la indang career nung mezüingbuba BWF World Tour title ka benogo.

Punjab nungi arishi küm 17 tain asayar yagi Taipei Open Super 300 tetsür kija asaya final nung Vietnam tsür sixth seed Thuy Linh Nguyen 21-16, 21-16 agi straight games nung koka liasü. Tena tsüingda minute 36 asaya.

Iba takok anguba sülen la ya iba asayamung akokba tetsür aser tebur asayartem rongnung

tanutsütila kümogo.

Iba takok ajanga Tanvi kanga kara renloka aoba sayur, shiba India nunger badminton asayartem rongnung tarutsü tajung aliba asayar ka lir.

Tanvi ya taoba mapang world junior No. 1 asayar liasü, aser lai junior aser senior asaya naprongla nung kanga junga asaya arudar. La ya India nunger asayartem rongnungi World Junior Championships edition ka nung medal ana anguba mezüububa asayar lir. Lai iba asayamung nung tetsür kija asaya nung silver angu aser mixed team tetoktepba nung bronze medal ngua liasü. Maneni la ya Asian Team

Championships akokba India squad nunga densema liasü.

Tanvi senior jenjang nung asayaba mapang 2025 küm arishi küm 16 asüba mapang US Open nung mezüingbuba BWF World Tour Super 300 final ka tongteta liasü. Iba sülen la Odisha Masters aser Guwahati Masters nunga runner-up liasü aser tang Taipei Open nung takok ngua asayatetogo. Lai kanga junga asaya aruba ajanga la world's top 35 rankings-i iogo.

Arishi küm 17 ser anogo 222buba nung Tanvi ya Taipei Open puti otsü nung final tonga asayaba asayartem rongnung tanutsütila kümogo. Lai Korea nunger tarep asayar Lee Yong Dae ajatetogo, shibai arishi küm 17 ser anogo 278buba nung 2006 küm tebur tarep final tongteta liasü.

Deobarnü Tanvi-i final asaya kanga junga tenzük aser shot tajung aika asayaba sülen lai mezüingbuba set ayong ayonga akok.

Tanabuba game yabo Nguyen-i kanga tashi ita tenzük aser la 3-0 agi tejakdang liasü Ajisiüaka break tashi nung Tanvi 11-8 agi tejakdang aküm.

Iba sülenbo Tanvi-i asaya azüokatok aser asaya 21-16 agi koka liasü.

Jasprit Bumrah Sri Lanka den Tests asayamung masayatettsü

Luroi/August 2, 2026

(Agencies): August 15 nü nungi tenzüka Galle nung Sri Lanka den test ana asayatsü aliba nung Jasprit Bumrah masayatettsü.

TimesofIndia.com sangdong ka ajanga ashiba agi, BCCI Centre of Excellence (CoE) nung temang tendangba sülen Bumrah temekok tabelen yiruba nung maneni minprong aliba ngutetogo. Ken o dak sendaka alirtemi pa anogjungi masayadaktsütsü atema telemtetba agiogo aser taneptsü kanga junga ngurang asayatsü tetuyuba agütsüogo.

BCCI medical team-i Bumrah dang temekok nung timtem aliba atema injection ka agitsü tuyu. Pa T20 World Cup tatemlen yirushia liasü. Arishi küm 32 tain asayar nem taoba ita injection agütsüogo, saka pa imlaba dang nungi temenuba aneptsü akok.

Pa Colombo nung tanabuba Test nungbo asayadaktsütsü atema sensaksemogo, saka CoE nung medical team-i pa masayadaktsüner.

Pa asayadaktsütsü atema ano mapang talangba atatsü sentong lir asünung pa August 4 nü SL-i aotsü atema August 3 nung adenshirtem rongnung madentsü.

"Taoba mapang asayartem

taneptsü junga mongujungi asayadaktsüba ajanga timtem ajangshiogo. Tanaben risk magitettsü, talisa asayar ya Bumrah asünung tali kümdangshitsüla. Pa taneptsü kanga junga ngudaktsütsü onok nükjidong lir aser taküm ano asayamung aika asayatsü lir. Taküm Asian Games, New Zealand tour aser taruba küm tetenzüklen Border-Gavaskar Trophy asayatsü lir," ta source kati ashi.

Shubman Gill-i aniba squad nung Bumrah züingoksemer liasü, saka pa taneptsü kanga junga angu nungdang asayadaktsütsü ta shir liasü. Tang Ajit Agarkar-i aniba senior selection committee-i pa melenas asayar ka shimsüsa akümtsü.

Asayartem rongnung Auqib Nabi shimsü imlar, kechiyong pa Afghanistan den Test ka masaya tsüingda team den training agi aser taoba ita India A team nungi Sri Lanka nung oa asayaogo.

Arishi küm 29 tain asayar yagi domestic circuit nung Jammu & Kashmir team nungi kanga junga asaya arudar. Sri Lanka den asayaba mapang pai asaya ana nung wicket trok agia liasü. India nunger bowling unit nung tang Mohammed Siraj, Gurnoor Brar aser Prasad Krishna nunger lir.

Litton Das Bangladesh Test team nung züingoksemogo



Litton Das

Luroi/August 2, 2026

(Agencies): Australia den Test ana asayatsü lia Litton Das mapang shitak nung taneptsü anguba ajanga Bangladesh team tashi itshidaktsüogo. Arishi küm 31 tain asayar ya tetsüing tabelen temola yiruba ajanga June ita nungi masayai liasü, saka pa taneptsü anguba sülen national team nungi asayatsü temsüa akümba sangdongogo.

Bangladesh Cricket Board (BCB)-i ashiba agi, August 13 nü mezüingbuba Test metenzük tsüingda Liton ya Deobarnü Darwin-i oa team den longjemtsü.

Litton team nung adenba ya Bangladesh asoshi osang tajung, kechiyong parnok taoba asayamung nungbo tamakok nguogo. Team nung fast bowler Nahid Rana densema mali aser

Shoriful Islam-a yiruba ajanga mezüingbuba Test nungbo masayatettsü.

Taruba asayamung ya Bangladesh cricket atema kanga dang tongtibang lir, kechiyong parnok küm 23 sülen tang mezüingbuba Australia nung oa Test asayatsü lir. Mezüingbuba Test masaya tsüingda Bangladesh team Cricket Australia XI den Darwin nung August 6 nungi 8 tashi anogo asem warm-up asaya ka asayatsü.

Mezüingbuba Test ya Marrara Cricket Ground, Darwin nung August 13 nungi 17 tashi asayatsü, aser tanabuba Test ya Great Barrier Reef Arena, Mackay nung August 22 nungi 26 tashi asayatsü.

Litton ya Bangladesh indang ODI captain asütsü shimba

sülen anogo ishika dang lir tang Test team nunga züingoksemogo. Pai Mehidy Hasan Miraz melenogo, shibai 2025 küm June ita nungi team anir aruogo, ajisiüaka Zimbabwe den ODI asaya 2-1 agi makokba sülen pai captain mapa tokja liasü.

Miraz lenisüba nung team ODI 20 asaya. Iba mapang parnoki asaya 10 akok aser teku mekoki liasü. Bangladesh team-i Miraz lenisüba nung kidang West Indies, Pakistan, Australia aser New Zealand nunger ajak kokogo.

Litton ya Bangladesh indang T20I captain liasü aser 2027 ICC Men's Cricket World Cup atema renemshiba mapang tang ano ODI captain mapa-a pa nem nongloktsüogo. Pa taoba mapanaga Bangladesh indang ODI captain mapa khenbo inyakogo.

Australia Tests atema Bangladesh squad:

Najmul Hossain Shanto (captain), Soumya Sarkar, Shadman Islam, Tanzid Hasan, Mominul Haque, Mushfiqur Rahim, Amite Hasan, Jaker Ali Anik, Mehidy Hasan Miraz (vice-captain), Taijul Islam, Taskin Ahmed, Hasan Mahmud, Syed Khaled Ahmed, Ebadot Hossain, Musfik Hasan aser Litton Das.

Chelsea-i Welbeck den tenangzüktepba yangluba jangjatsüogo

Luroi/August 2, 2026

(Agencies): Chelsea-i Brighton nungi striker Danny Welbeck alizükba jangjatsüogo.

Taoba mapang Manchester United aser Arsenal forward yagi küm ana atema tenangzüktepba yangluogo. Ajisiüaka club anapronglai pa alizükba taah indang memettdaktsü.

Welbeck-i taoba season Brighton nungi asaya 37 nung asayaba mapang goal 13 idaktsüogo, koba pa indang career nung season ka nung goal timtiba idaktsüba liasü.

Pa ya Chelsea puri tang transfer window nung alizükba asayar tasembuba kümogo. Chelsea-i Aston Villa nungi Morgan Rogers aser Atalanta nungi Marco Palestra na alizükogo.

"Chelsea-i na alizüktsü tejangraba lir ta osang angashiba ya kanga nemdangtsü ka liasü," ta Welbeck-i ashi.

"Ni asayartem karbo meteta lir aser ni manager den kanga junga sensaksemogo. Ni tejangraba tulu lir aser Chelsea nung sendaka alir aser club pusemertem ajak nema

dangdaktsütsü atema ni club atema takokba tashi ajak inyaktsü," ta paisa shisem.

Welbeck alizükba ya Chelsea kiburi transfer strategy melenshiba ama reprangteter, kechiyong parnoki 2022 küm nungi lanur asayartem dang alizüktsü atema inyaka aruogo.

Pa club nung adenba ajanga Chelsea nung tanga centre-forward tarutsü indang tasüingdangba ka adoker.

Joao Pedro ya club indang first-choice forward ama züingshir aser Liam Delap, Emmanuel Emegha, Marc Guiu aser Nicolas Jackson nunger ajak forward tem lir.

Welbeck indang carrer ya Manchester United nungi tenzüka aser pa 2014 küm Arsenal-i pound million 16 agi alizükba liasü.

Pa Arsenal nungi küm pongu asayaba sülen Watford nung aden aser 2020 küm Brighton-i oa liasü.

Welbeck England team nungia 42 ben asayaogo aser iba mapang pai goal 16 idaktsür lir. Pa tatamsa linük team nungi 2018 küm asaya aser taküm World Cup squad nunga mezüingoki liasü.

BILEMDANGANG

"Aibelen ya angazüktsü atema maongka tajung ka lir."